

四庫全書

史部

欽定四庫全書

史部

欽定八旗通志卷

一百二十一至
一百二十二

欽定四庫全書

欽定八旗通志卷一百二十一

人物志

志書之有人物蓋自漢晉以來矣襄陽耆舊汝南
先賢其記載之權輿乎唐宋至今凡一郡一邑之
志洎夫天下之通志無不蒐羅史籍探索金石以
表章懿淑垂軌將來亦敦崇世教風勵人心之義
也我

國家

龍興東土奄有埏紘貞元會其昌期斯川岳鍾其靈氣
風雲龍虎英喆輩生炳炳然與虞臣周佐爭光者
蓋不可以殫數

列聖相承教養培植百有餘載我

皇上撫臨函夏益鞠益謀四極四合罔不率迪而八旗
根本之地沐浴

聖化觀感尤深故高門巨閥詠駿烈誦清芬者尤繩繩

繼起此人物一志所以視往古為盛也然歷朝輿
記泛濫者多即八旗舊志但據碑誌之文者亦或
不免亦既仰請

睿裁一以

國史列傳為準誠足以信今傳後昭袞鉞之至公惟
是

國史之例義兼彰瘡故美惡並存志書之例則遐稽
古籍並以揚善為宗苟斷限不嚴則體裁為舛今

敬擬宗室王公以及内外文武大臣惟以功名終始者得入此編或先麗刑書後蒙

天鑒宗室如睿親王大臣如鰲拜等亦得並入若其初年弔免得荷

恩榮末路昏迷自羅罪譴雖有功績均不敢濫收又八旗漢軍如范文程之生原豐邑功比鄼侯自宜垂光於竹帛其他勝國舊臣倒戈順命如洪承疇等雖勤勞茂著顯秩酬庸然我八旗滿洲中應天佐

運百戰開疆勲業遠出其上者史不勝載實不借
楚材晉用以焜耀旂常況我

皇上的大公至正扶植綱常甄別貳臣各為列傳一筆一
削義秉春秋其人既瑜不掩瑕尤未可列為臣範
其或家承帶礪延及子孫果有挺出之才仍一體登
諸簡牘庶一奪一予均得其平至於宗室襲封諸
臣世爵

國史之例子孫各附其祖父以著淵源今志人物

則必其卓有樹立無忝家聲乃得列為附傳若世澤相承並無事迹及雖有事迹而未為特出者其世系支派則詳載於封爵世職二表茲不復贅焉

人物志一

宗室王公傳一之上

和碩禮烈親王代善
康良親王傑書
謹案宗室

諸傳先列親王而郡王貝勒等以次遞及故不叙
世代然每一親王下各有子孫表著者宜連屬比
附以便覽觀則又難劃然序爵也茲敬以傳之一
載禮烈親王及其子孫傳之二載鄭獻親王及
其子孫傳之三載睿忠親王傳之四載豫通親王
傳之五載肅武親王傳之六載永澤親王敬謹親

王傳之七載追封親王者饒餘郡王是也傳之八亦追封親王者靖定貝勒是也傳之九載原封親王者英親王是也蓋首卷至此皆親王而中間各以子孫分附焉至傳之十乃載誠毅貝勒篤義貝勒安平貝勒等傳之十一載原封貝勒阿敏等傳之十二載鎮國公阿拜至鎮國將軍洛託大略序爵之中仍各彙其派係庶披覽之際有條緒可尋云

和碩禮烈親王代善

子滿達海

代善

太祖高皇帝次子初從征哈達輝發葉赫等國論功封貝勒丁未年以東海瓦爾喀斐悠城人苦烏拉國貝

勒布占泰之虐乞移家歸附代善與兄褚英隨貝勒舒爾哈齊及一等大臣費英東侍衛扈爾漢率兵三千往徙之軍夜行見大燾上有光衆以為異捫視無有復樹之光如初舒爾哈齊疑非吉兆欲回兵代善與褚英並決意進兵遂至斐悠城盡收環城屯寨凡五百戶令扈爾漢率兵三百衛之先行布占泰發兵萬人邀諸路次日代善與諸貝勒至率兵奮禦遂渡河代善與褚英各率兵五百分

二路緣山擊之烏拉兵遂敗代善追及烏拉統兵
貝勒博克多從馬上左手攫其胄而斬之

上嘉其功賜號古英巴圖魯癸丑年正月布占泰背盟代
善隨

上統大兵征之既攻克遜扎塔郭多鄂謨三城布占泰率
兵三萬越富勒哈城而軍時領兵諸貝勒大臣皆
欲戰

上曰征伐大國豈能遽使無弔遺乎代善曰所慮者無計

令布占泰出城耳今彼兵既在平原曠野可一鼓擒也舍此不戰厲兵秣馬何為今我兵士飽馬騰列陣在此當決戰

上曰爾等衆志既孚即決戰可也時諸貝勒大臣及軍士皆踴躍遂進兵烏拉兵大敗十損六七餘皆棄兵甲遁我兵乘勢奪門遂克其城布占泰率敗兵不滿百回至城下見城陴悉樹我軍旗幟大驚潰代善復統兵截擊之布占泰僅以身免竄葉赫所屬

城邑皆降編戶萬家天命元年

上初正大號叙羣臣功封和碩大貝勒四人以代善為首

三年四月

上以七大恨告

天興師征明行二日雨欲旋師代善言天降此雨以懈明
將之心吾進兵乃出其不意

上善之遂進圍撫順明遊擊李永芳以城降東州瑪哈丹
二城及臺保五百餘皆下携降衆還既出明邊二

十里明總兵張承廕等率萬人來追代善同

四貝勒返戰

上遣使止之代善奏曰彼若待我我則與戰若不待是必走矣當乘勢追襲無使我兵寂然歸致謂我怯也

上然之亦移師入邊破其三營斬承廕及副將頗廷相叅將蒲世芳遊擊梁汝貴等四年三月明大發兵四路來侵

上親禦西路

命代善前行偵者告明兵六萬出清河代善曰清河道仄
崎嶇未能驟至當先禦撫順乃與扈爾漢先出扎
喀闕方謀設伏待敵會

四貝勒至謂界藩有築城夫役宜急衛之遂直趨界藩據
吉林崖時明總兵杜松結營薩爾滸山而自引兵圍
吉林崖衆貝勒遂分兵千助吉林軍

上至

命先攻薩爾滸山我兵仰射奮擊破之適所遣助吉林崖

軍亦乘勝合擊大敗明兵斬杜松及搃兵王宣趙
夢麟等而明搃兵馬林復夜營尚間崖代善以三
百騎往視遣使馳報

上親臨明兵四萬已成陣代善策馬先入衆貝勒繼之明
兵敗潰斬副將麻岩林僅以身免代善復與

四貝勒統兵敗明搃兵劉綎兵四萬於阿布達哩岡綎歿
於陣旋收降朝鮮助明之將士而還七月從

上攻鉄嶺城敗助明之蒙古兵八月從

上平定葉赫六年三月

上親征明瀋陽既敗明搃兵李秉誠等代善偕其子台吉
岳託追四十里斬馘無算七月鎮江城軍陳良
策與居民潛通明將毛文龍令別堡之民詐稱兵
至大呼噪城中驚擾良策乘亂執城守遊擊佟養
正殺其子豐年并從者六十人叛投毛文龍

上聞之

命代善同莽古爾泰率兵三千遷金州沿海居民於復州

十一年八月

太祖龍馭上賓代善及子岳託薩哈璘共作議書詣

朝以書示大貝勒阿敏等言推戴

太宗文皇帝嗣統衆皆喜

上讓至再三代善言益懇切衆議亦堅乃

從之十月

命率精兵萬人往征蒙古喀爾喀扎魯特部執貝勒巴克

父子三人及貝勒拉什希布岱青多爾濟桑阿爾齋

等十四人殺鄂爾齋圖貝勒俘其屬戶還天聰元
年五月奉

命與貝勒阿敏碩託率正紅鑲紅鑲藍三旗兵征明攻錦
州薄寧遠城殪殺無算因溽暑班師三年十一月
上親征明入洪山口克遵化趨京城北土城關之東駐營
明大同總兵滿桂宣府總兵侯世祿以兵來援至
德勝門代善領兵進擊敗之追至隘口掩殺甚衆
十二月攻克良鄉還破敵永定門南遂隨

上率護軍礮手五百往視薊州形勢代善先發會明山海關步兵五千米援薊州距城二里許與我兵遇敵兵不敢入城遂立營環立車盾鎗礮代善麾左翼四旗護軍攻其東破之四年二月明兵部侍郎劉之綸率兵至遵化踞山營代善率八旗護軍兵攻之圍其山招之綸降不從遂縱兵攻破其七營之綸遁巖中我兵射殫之擒遊擊守備各一五年七月從

上圍大凌河城正紅旗兵圍西北代善軍為策應時城外
守臺明兵害我遊牧十人掠駝馬去代善與貝勒
濟爾哈朗等率兵三千以紅衣礮攻其臺焚近臺
房屋百餘間獲駝馬數十留兵守之九月明監軍
道張春總兵吳襄等率兵四萬自錦州來援距城
十五里代善隨

上率滿洲蒙古舊漢兵約二萬迎擊之敵馬步兵合營四
面列大小礮及鳥鎗我右翼兵衝入敗之襲及其

副將桑阿爾齋適春復收潰卒而軍乘西風縱火逼我營甚急會天雨反風熾敵營我兵合攻之陣斬副將張吉甫等生擒春及副將張洪謨楊華徵薛大湖等時被擒各官見

上皆跪拜獨春不跪

上欲誅之代善曰我兵前此陣獲之人無不收養此人欲以死成名奈何殺之以遂其志遂赦之八年五月隨上率兵征明出榆林口至宣府境率兩紅旗及蒙古兵

自喀喇鄂博入攻德勝保殲其衆明城守泰將李
全自縊死保民皆潰逃進攻大同懷仁縣未克遂
由朔州趨馬邑八月

上親攻大同代善率兵來會獻俘獲還十年四月

上建國號大清改元崇德大封功臣晋代善和碩兄禮親
王十二月從

上征朝鮮受其國王李倬降以歸八年八月

世祖章皇帝嗣位王與鄭親王濟爾哈朗睿親王多爾袞

同輔政時郡王阿達禮貝子碩託謀立睿王多爾
袞禮親王代善發其謀阿達禮碩託伏誅碩託代
善第二子阿達禮則其孫也衆咸謂王大義滅親
比烈周公云順治五年十月薨年六十有六以第
七子滿達海襲親王爵

賜號曰吳是年定

賜祭葬銀例親王應五千兩奉

旨特賜銀萬兩六年十月立墓碑紀功康熙十年五月

上特表王功績追謚曰烈復立碑表墓子八人長子克勤
郡王岳託第三子顯親王薩哈璘俱自有傳乾隆
十九年九月入祀

盛京賢王祠四十三年正月

上以王與鄭親王濟爾哈朗睿親王多爾袞肅親王豪
格克勤郡王岳託並

太祖

太宗

世祖時戮力行間櫛風沐雨之親藩宜配饗

太廟又以王等初封嘉號當長延奕祀

詔現襲禮親王爵之康親王復封號曰禮吳親王滿達海
禮親王代善第七子天聰二年大兵征明錦州滿
達海率師往截明杏山糧運於海上取之崇德五
年復從大兵圍錦州擊敗杏山援兵又以紅衣礮
擊敗松山馬兵六年五月封輔國公八月從肅親
王豪格圍松山以本旗兵擊敗明松山兵錦州城

中有兵出城刈草率右翼侍衛擊走之明兵犯鑲
紅旗營滿達海擊敗之明總兵洪承疇以兵十三
萬援錦州滿達海以步戰破其三隊承疇兵復來
犯力拒之馬被創肅親王豪格易以馬甫就騎而
敵大至乃奮勇返擊殿後而還明兵復乘雨來犯
率兵擊却之明總兵吳三桂率兵據山立營滿達
海偕諸軍擊破之三桂宵遁十一月從豫郡王多
鐸赴寧遠有明兵運粟海上率兵擊取之七年四

月從鄭親王濟爾哈朗等征明克塔山八年從征
明中後所前屯衛俱有功八月授都察院承政順
治元年四月從睿親王多爾袞入山海關擊走流
賊李自成復敗之於望都縣十月晉封固山貝子
隨英親王阿濟格追剿自成由邊外趨綏德二年
二月進克沿邊三城及延安府又追賊至湖廣承
天府破偽肅王八月凱旋三年正月從靖遠大將
軍肅親王豪格剿四川流賊張獻忠七月由漢中

進秦州圍賊渠高如礪於三台山如礪降十一月
師至西充斬獻忠肅親王令偕貝勒尼堪等分剿
遵義夔州茂州榮昌隆昌富順內江資陽諸處餘
賊四年八月班師六年四月襲父和碩親王爵七
月授征西大將軍與多羅謙郡王瓦克達征大同
叛鎮姜瓖攻朔州寧武等處八月克朔州馬邑降
寧武關偽總兵劉偉偽道員趙夢龍及副將以下
官弁五十餘員馬步兵五千四百餘名靜樂縣寧

化所八角保山寨悉平遂會端重親王軍克復汾
州斬偽巡撫姜建勲偽布政使劉秉業等偽總兵
楊振威斬瓌首獻英親王軍大同平十月遣護軍
統領索渾圖平遙偽知縣劉三元棄城走又遣署護軍統領
希爾根圖太谷以紅衣破其城偽知縣李成沛偽都司吳
成器率衆遁遣兵追殲之時潞安府賊分兵拒沁州又圍遼州王
復遣多羅貝勒拜音圖護軍統領索渾圖馳赴沁州賊聞風遁
遂拔沁州趨潞安偽道員胡國鼎來戰大兵圍之比夜遁

去遣兵邀擊殲之又遣鎮國公漢岱署護軍統領
希爾根赴遼州擊破賊兵屯留襄垣榆社武鄉等
縣俱降尋

召還京七年二月同理六部事八年二月加封號吳親王
三月

命掌理吏部事六月

上幸南苑

賜鞍馬九年二月薨年三十一諡曰簡七月以長子常阿

岱襲封吳親王十六年追論滿達海與睿親王素
無嫌分取其所遺財物掌吏部時尚書譚泰驕縱
不能糾削爵謚並降常阿岱爵為貝勒

詔以多羅康郡王傑書襲其祖代善親王爵康熙四年常

阿岱薨謚懷愍第六子星尼降襲固山貝子次子

錫倫圖於十五年封奉恩將軍三十六年從征厄

魯特有功加一雲騎尉後俱停襲乾隆四十三年

三月

上以吳親王滿達海著有勞績

賜一等輔國將軍爵世襲罔替以滿達海七世孫福色陁

額襲

和碩康良親王傑書

傑書禮親王代善孫父祜塞禮親王第八子順治
三年六月封鎮國公是年卒以傑書兄精濟襲封
鎮國公尋晉多羅郡王六年三月薨謚懷愍十月
傑書襲多羅郡王八年二月加號曰康十五年五

月

詔以傑書爵追封其父祜塞為多羅郡王謚惠順十六年
十二月吳親王常阿岱降貝勒乃以傑書襲其祖
代善和碩親王爵仍號康康熙元年三月追贈其
父祜塞為親王十三年三月逆藩耿精忠據福建
反分兵犯浙江江西六月授傑書奉命大將軍同
貝子傅喇塔由浙江進剿九月師駐金華總督李
之芳駐衢州破賊于焦園紫瑯山賊將徐尚朝引

兵五萬犯金華王令都統巴雅爾副都統瑪哈達
迎擊斬賊將吳榮先等三十餘人殲賊兵二萬十
二月尚朝復率馬步兵三萬土寇二萬逼金華城
南十二里莊巴雅爾與總兵陳世凱等會剿破之
於積道山殺二萬餘復永康縉雲二縣賊將馮公
輔由義烏遁武義遣署前鋒統領希福躡之苦竹
嶺斬殪甚衆賊將沙有祥據桃花嶺梗處州路瑪
哈達與總兵李榮等擊潰之副都統穆赫林又敗

之于白水洋十四年正月復處州府及仙居縣公
輔尚朝等猶據宣平松陽屢窺處州都統拉哈達
偕諸將禦剿破之石塘石佛嶺大王嶺東隴隘口
上套寨下五塘等處時寧海將軍貝子傅拉塔由
黃巖規復溫州叛鎮祖宏勲曾養性糾賊數萬倚
山憑江水陸抗阻

上命傑書由衢州進回奏處州方有賊警金華兵力弱難
驟進十五年三月

諭趣之曰王坐守金華將及二載徒以文移往來為事不
親統官兵進剿逆賊何日可滅宜尅期進取毋再遲延
觀望貽誤軍機八月自金華移駐衢州敗賊于大溪灘
復江山常山二縣進攻仙霞關偽叅將金應虎迎
降遂長驅抵浦城縣攻拔之乃傳檄精忠言浦城
為閩中財賦要地今大兵攻拔已扼咽喉與其繫
頸就戮曷若立功贖罪以全百萬生靈九月復建
陽撫降建寧延平二府精忠益震懼無措遣其子

顯祚來迎師王遣人賁免死

勅諭示之十月精忠出城六十里迎降獻所屬官兵冊籍
王遂入駐福州奏精忠請隨大軍勦海賊鄭錦以
贖罪

上報可時錦偽總統許耀率兵三萬直逼福州至烏龍江南
石門枕峯諸山結寨遂遣叅贊軍務都統拉哈達
率兵進剿大敗之追擊四十餘里十一月疏言精
忠出剿海賊其弟昭忠聚忠宜以一人來福州統

轄藩屬又疏言福州經制兵已照原額全設精忠
隨大軍所率佐領下兵數已不少其左右兩鎮官
兵可並裁汰宏勲養性應令赴京候補

上命耿昭忠為鎮平將軍駐福州餘如所請是月王遣穆
赫林等擊敗偽將軍吳淑于浦塘復邵武府進師
泰寧偽總兵王安邦等降汀州府及所屬諸縣悉
復十六年正月拉哈達賴塔破賊將趙得勝何祐
等二十六營于白茅太平諸山復興化府二月復

泉州漳州二府奏入

諭曰王統率大兵自衢州入仙霞關直抵福州剿撫並用
所向克捷擊逐海賊收復全閩安輯百姓克奏膚功深
為可嘉三月疏言福建既平臣即欲統兵入粵但省會
重地未可輕離且距漳州遠恐遲至炎暑難進師
先就現駐漳州汀州騎兵令將軍拉哈達等率同
耿精忠赴潮州尋遣總兵馬三奇前鋒叅領都克
納敗海賊於龍溪十二月海賊率兵五千餘犯泉

州府所屬小營地方副都統楊鳳翔擊敗之十七年閏三月海賊犯漳州提督段應舉卻之四月賊陷平和環逼海澄穆赫林段應舉守禦越七旬外援不至城遂陷長泰亦陷王以援遲請罪

詔俟師旋再議七月賊陷同安惠安王遣署副都統禪布提督楊捷統兵進剿兩路夾攻復之十月都統賴塔等破賊于蜈蚣山復長泰又破賊於柯鏗山萬松關副都統吉勒塔布提督姚啟聖提督楊捷等

敗賊將劉國軒於江東橋又敗之於潮溝之間副都統瑚圖敗吳淑於石衛寨斬獲無算盡奪賊寨沉其船十八年正月吉勒塔布及巡撫吳興祚擊賊劉國軒吳淑何祐等於郭塘歐溪頭大敗之追至江邊斬首二千餘級生擒偽總兵一偽副將二月國軒等犯江東橋吉勒塔布迎擊賊敗走太平寨我兵追勦斬賊千餘十月副都統沃申敗賊衆於東石城克之吉勒塔布復敗賊于鰲頭山十

九年二月沃申率滿洲綠旗兵進至大定山奮勇
剿殺賊遁尾其後斬獲無算焚燬賊巢恢復大定
小定地方大兵水陸分進規取玉洲劉國軒竄石
馬海澄間我兵急追之走廈門隨遣官招撫海澄
偽提兵蘓堪開西門迎降玉洲石馬賊巢悉破復
海澄水師提督萬正色克海壇三月拉哈達楊捷
等克廈門金門賴塔克銅山焚燬賊巢餘賊竄臺
灣先是精忠為藩下恭領徐鴻弼等首其歸順後

尚蓄逆謀王疏請逮治

上密諭王令自請來京至是精忠亦自請入

覲王亦奉

詔班師五月疏言閩省投誠兵多需餉浩繁廈門金門已
恢復宜留八旗兵六百守泉州二千四百分守福
州漳州餘皆隨還十月凱還至京

上率諸王大臣等至盧溝橋迎勞傑書行抱見禮十一月
命預議政二十二年正月疏言官兵向駐永興城中與賊

對壘仰荷

天眷靈神顯助於雞公山真武廟旁監旗列隊一時官兵
賊衆無不共見於是軍氣奮賊勢退沮其雞公
山廟神理應特致褒旌祀典以垂永久得

旨如所請春秋致祭二十九年七月率兵屯歸化城備剿
喝爾丹尋以撫遠大將軍裕親王福金將抵烏蘭
布通

詔移師會之至則賊已竄十月撤還三十六年閏三月薨

年五十三謚曰良建碑墓道七月以傑書第六子
椿泰襲和碩康親王爵四十八年薨謚曰悼長子
崇安襲雍正五年掌宗人府事十一年薨謚曰修以
椿泰弟原封三等輔國將軍巴爾圖襲乾隆十八年
薨謚曰簡以崇安第二子原封多羅貝勒永恩襲
十九年總理正黃旗覺羅學四十三年正月

命復禮烈親王始封之號仍為禮親王

欽定八旗通志卷一百二十一

欽定四庫全書

欽定八旗通志卷一百二十二

人物志二

宗室王公傳一之中

和碩穎毅親王薩哈璘多羅順承恭惠郡王勒克德渾

多羅謙裏郡王瓦克達 輔國公瑪瞻

和碩穎毅親王薩哈璘

薩哈璘禮烈親王代善第三子天命十年十一月
察哈爾林丹汗圍科爾沁薩哈璘以精騎五千援

之林丹汗遁十一年四月討喀爾喀巴林部十月
隨征喀爾喀扎魯特部俱有功是年封貝勒天聰
元年五月

上親征明薩哈璘與貝勒德格類等率精騎為前隊至錦
州明兵遁薩哈璘邀殲之復與三貝勒莽古爾泰
等率偏師往衛塔山糧運有明兵二萬與我前軍
八十人遇擊敗之獲其馬匹甲冑大兵進圍寧遠
明總兵滿桂率密雲兵出城東二里列陣我兵擊

敗之追至城下薩哈璘同諸貝勒分兵勦殺大殪
之薩哈璘被創戰彌厲三年十月

上征明次波羅河屯大貝勒代善等密請班師

上不懌薩哈璘同貝勒岳託等力勸決進取遂由洪山口

克遵化進逼明北京至德勝門敗明兵之來援者
十二月同諸貝勒畧通州焚其船克張家灣圍永
平克香河縣又殲沙河驛蒙古兵之出奔山海關
者五百人四年正月克永平同貝勒濟爾哈朗奉

命統兵萬駐守永平有李春旺者訛言將屠城以惑衆擒斬之別遣人招諭所屬之臺頭營遷安灤州建昌營鞍山保皆降事具鄭獻親王傳三月遣軍敗明副將張宏謨兵四月明兵自樂亭撫寧來攻灤州薩哈璘率兵援擊之敵兵遁二貝勒阿敏來代乃攜所俘還五年七月初設六部

命薩哈璘掌禮部事是月

上征明與貝勒杜度豪格留守六年五月同濟爾哈朗等

率右翼兵畧歸化城黃河諸路俘蒙古千餘復指授歸順蒙古諸貝勒牧地申約法十月師還七年

六月

詔問征明及察哈爾朝鮮三者何先奏言當寬朝鮮拒察哈爾而專征明察哈爾雖不加征如蟲食穴中勢必自盡不煩急圖至於明若我兵少緩一年彼守禦益固臣意謂當視今歲秋成乘彼禾稼方熟即往攻之因糧於敵為再進計量留兵防察哈爾

上與諸貝勒先率精騎直入往來襲擊略其所屬即還再
數遣人說祖大壽並

命貝勒率精兵自一片石入山海關則彼寧遠錦州為無
用或仍從故道入斷北京四路度地形奪其糧餉
充足之地據守勿歸乘機伺便二三年中大勲克
集矣八月同諸貝勒略明山海關師還

上以不乘勝入內地責之八年二月同貝勒多爾袞往迎
明將尚可喜招撫廣鹿長山二島獲戶口三千八

百有奇五月從大兵征明薩哈璘同諸貝勒奉

命由喀喇鄂博入邊攻克得勝保殲其兵明城守叅將李
全自縊復進兵大同攻懷仁八月略代州偵崞縣
城頽壞夜半往襲拔之王東板鎮二堡居民皆潛
遁復擊敗代州騎兵百步兵三百追薄其城乃還
率兵謁

上於大同獻俘獲九年同多爾袞岳託豪格等統兵往收
察哈爾林丹汗子額哲途遇察哈爾汗之妻及台

吉索諾木率所屬千五百戶來降進抵托里圖盡
取額哲全部時岳託駐軍歸化城薩哈璘同多爾
袞豪格進略山西各府縣仍自歸化城旋事詳睿
忠親王傳崇德元年正月薩哈璘有疾

上臨視再三見其羸瘠愀然淚下五月薨年三十有三薩
哈璘明達聰敏通曉滿漢蒙古文義掌禮部事贊
謨猷

上深嘉之及其薨不勝震悼入哭者四自辰至午乃還

宮仍於庭中設

幄座不御飲食至戌乃入

輟朝三日祭時

上親奠酒慟哭追封和碩穎親王讀冊畢復痛哭三奠諸

王文武大臣皆泣下六月

上御翔鳳閣偶假寐夢人請曰穎親王乞

賜牛一如是者再寤以問希福等皆奏言

皇上悼念甚切故有此夢

上曰不然此夢最真切當別有故於是希福等檢閱會典
凡親王薨初祭時例賜一牛穎親王初祭未用牛
上命致祭如禮康熙十年五月追謚曰毅乾隆十九年九
月入祀

盛京賢王祠薩哈璘長子阿達禮初襲封多羅郡王
崇德三年二月從征喀爾喀至博碩堆偵扎薩克
圖汗遠遁乃還五年正月同鄭親王濟爾哈朗等
駐義州迎來歸蒙古多羅特部於杏山西五里臺

敗明追兵

賜御廐良馬一六年三月同鄭親王圍錦州降城中蒙古
台吉諾木齊吳巴什等四月敗明援兵於錦州南
山西岡六月敗明松山援兵九月圍松山明兵犯
我鑲黃正紅正黃三旗營汎擊敗之斬級千四百
餘七年二月克松山城俘明總督洪承疇巡撫邱
民仰等事俱詳鄭獻親王傳七月叙功

賜鞍馬一蟒緞九十尋

命管禮部事預議政先是

上御篤恭殿王以下衆官皆立侍九月王請更定儀制

上御殿及

賜宴親王以下皆跪迎

上升陛方起

駕興亦如之十月貝勒阿巴泰征明薊州同豫郡王多鐸

屯寧遠牽制援兵八年八月

世祖章皇帝嗣位以阿達禮與貝子碩託謀立睿親王伏

誅爵除

多羅順承恭惠郡王勒克德渾

子勒爾錦
錫保

孫

勒克德渾額毅親王薩哈璘次子兄阿達禮原襲
郡王爵順治元年以謀立睿親王伏誅勒克德渾
緣坐黜宗室順治元年十一月

上念勒克德渾時年幼未與謀

命復入宗室封多羅貝勒二年七月

命為平南大將軍代豫親王多鐸駐江寧分兵平定閩浙

是時明魯王朱以海竊據浙東稱監國其大學士
馬士英等率兵渡錢塘江距杭州城十里立五營
勒克德渾遣官兵擊却之九月遣左翼副都統珠
瑪喇等敗士英於餘杭遣右翼副都統和託等敗
其總兵方國安於富陽斬其副將二叅將遊擊五
及兩翼合營杭州三十里外敵來突復大敗之士
英國安復渡江窺杭州守杭州副都統濟席哈總
督張存仁總兵田雄等擊敗之溺死者無算時明

唐王之總督何騰蛟合流賊一隻虎等竊據湖南
州郡十一月勒克德渾奉

命同鎮國將軍鞏阿岱都統葉臣征之三年正月自江寧
抵武昌偵知叛賊總兵馬進忠王進才等應騰蛟
於長沙遣護軍統領博爾輝等率兵進擊賊千餘
掠臨湘殲之至岳州進才等俱聞風遁降其副將
黑運昌至石首聞賊渡江犯荊州遣尚書覺羅郎
球等以偏師赴南岸伺賊渡江擊之大兵去荊州

百里渡江夜疾馳詰旦抵荊州分兩翼直入賊營
大破之斬獲甚衆薄暮郎球等亦奪賊船千餘以
歸翌日遣奉國將軍巴布泰等分追賊兵於安遠
南漳喜峯山關王嶺襄陽府等處勦殺殆盡大兵
遂進彝陵流賊李自成弟孜偽磁侯田見秀偽義
侯張耐偽武陽伯李佑偽太平伯吳汝義及偽將
三十九人馬步賊兵五千餘詣軍前降獲械畜無
算捷

聞得

詔優獎七月班師

賜黃金百白金二千五年九月晉封多羅順承郡王尋同

鄭親王濟爾哈朗都統阿濟格尼堪統八旗前鋒

護軍兵拔湘潭擒騰蛟事具鄭獻親王傳移師征

廣西賊渠趙廉犯全州王率前鋒統領席特庫等

擊敗之獲馬四十餘聞賊渠曹楨予在道州據永

安關潛襲之破其營斬關而入九月賊復聚黨萬

餘寇道州又擊敗之七年正月凱旋

賜黃金五十白金五千五月預議政八年三月

特命管理刑部事九年三月薨年三十有四

賜祭葬如典禮康熙十年六月追謚恭惠第四子勒爾錦

於順治九年八月襲多羅順承郡王康熙十一年

八月掌宗人府事十二年十二月逆藩吳三桂反

於雲南由貴州犯湖廣

上命王為寧南靖寇大將軍由湖廣進征十三年三月師

次荊州時沅州常德繼陷賊兵自蜀道抵巴東襄陽勢甚急遣都統鄂內率官兵馳守是月偽將劉之復陶繼智等率舟師犯彝陵夾江立五營遣護軍統領額司泰等水陸並擊賊大敗遁回宜都是月襄陽總兵官楊來嘉副將洪福叛降三桂四月陶繼智復自宜都來犯敗之七月敗偽將軍吳應麒等十四年五月賊犯均州遣都統伊里布等屢敗之斬馘無算六月來嘉列陣山頂自山溝下斷

我歸路我師分擊之陣斬三千餘級是月疏言逆賊逼彝陵兵衆船多又於虎渡口諸處轉運糧餉火器宜急斷其運道請益戰艦備用

上命安遠靖寇大將軍貝勒尚善發岳州戰船四十艘赴荊州七月偽將軍張以誠王會等連來嘉犯南漳遣都統伊里布副都統根特會總督蔡毓榮兵援之旋報穀城失守復遣貝勒察尼前往奮擊陣斬三千餘復穀城九月疏言湖廣逆賊堅立營壘掘

壕塹設鹿角挨牌騎兵不能衝突須簡綠旗步兵
七千名造輕箭簾車二百礮車熟鐵礮各百量配
兵丁駕進填其壕燒其鹿角挨牌用礮轟擊滿兵
繼進則逆賊可滅

詔如所請十二月復疏請撥禁旅進勦

上以其遷延時日切責之十五年三月統兵自荊州渡江
遣前鋒叅領卦爾察敗賊文村又敗之石首尋以
擊賊大平街失利退荊州具疏請罪

上復切責之九月奏副都統塞格勦賊耶西復其城十七
年十一月奏先後偽官投誠及房縣來歸之偽總
兵何以敬等雖授劄示鼓舞而止食兵糧生計難
給

上以何以敬等慕化來歸悉予半俸十八年正月疏言新
增兵萬二千請設隨征前後左右四營總兵官分
轄從之遂渡江諸賊悉潰遁分路追勦松滋枝江
宜都及澧州以次恢復守百里洲偽將軍洪福率

舟師降二月大兵抵澧州進取常德賊先期縱火
焚廬舍戰艦遁偽按察使陳寶鑰等迎降又招撫
偽總兵黃志功副將楊達武巡撫李益陽知縣張
文明等又遣遊擊許嘉謨兵至青石渡賊首潘龍
等迎敵我兵左右夾擊追至平峪鋪斬馘及落崖
死者無算復衡山縣進攻歸州敗賊廖進忠於馬
黃山賊向巴東遁追至西壤大敗之復歸州巴東
十九年二月

命進取重慶尋奏留將軍噶爾漢之兵防禦荊州七月王率兵赴重慶半途返具疏自劾請解大將軍任往沅州軍前効力

上責令攜勅印率所屬官兵還京十一月議以老師糜餉坐失事機削爵以其第三子勒爾貝襲多羅順承郡王二十一年薨以第四子揚奇襲二十六年薨以第七子克保襲三十七年薨以第五子布穆巴襲布穆巴於五十四年五月以罪削爵以勒爾錦

之弟諾羅布襲諾羅布初於康熙三十七年授頭等侍衛三十八年二月擢鑲黃旗漢軍副都統十二月調鑲藍旗滿洲副都統四十年攝右翼前鋒統領四十二年授杭州將軍五十四年襲封多羅順承郡王五十六年二月薨年六十有八謚曰忠以其第四子錫保襲雍正三年三月掌宗人府事

命在內廷行走四年五月

諭曰順承郡王錫保才品優長乃國家實心効力之賢王

今在內廷行走差遣甚多王之費用亦多著給親王俸
護衛官員俱視親王例九月授鑲藍旗滿洲都統五年
九月調正黃旗漢軍都統先是錫保狗庇貝勒延
信罪狀不奏又將不能騎馬之章京派拿延信以
致遲悞十一月議削爵得

旨寬免其

特恩賞給之親王俸及護衛官員俱撤回尋降任左宗正
七年三月大軍征噶爾丹策凌

命王署振武將軍印赴阿爾台軍營八年十一月奏八旗
駐防官兵軍營効力兩年巡牧均已習練請仍留
俟大兵凱旋不必如例三年更代

詔如所請行初王奏喀爾喀游牧處措置妥協其三路副
將軍各思効力已將禦賊守城之策商酌預備九
年七月

上以錫保防範有方傳

諭慎籌喀爾喀戰守機宜八月

諭宗人府曰錫保自派往軍營以來辦理事務克殫誠心勤勞宣力甚屬可嘉王之祖多羅穎郡王亦係國家懋著勞績之賢王着將錫保晉封順承親王九月

命嚴守察罕度爾十月疏言準噶爾賊大策凌敦多卜小策凌敦多卜多爾濟丹巴等自華額爾齊斯至索勒畢烏拉克沁留兵四千應援率兵二萬六千犯科布多等處見我軍強盛不敢進遂抵克魯倫令賊將海倫鄂勒錐等掠喀爾喀遊牧大策凌敦多

卜兵向蘇克阿勒達呼屯劄小策凌敦多卜子曼
濟掠鄂爾海西喇烏蘇臣令王丹津多爾濟等合
兵邀擊至鄂登楚勒遣台吉巴海夜入大策凌敦
多卜營擒其衆賊將袞楚克扎卜喀喇巴圖魯復
率兵三千來禦我兵誘斬喀喇巴圖魯袞楚克扎
卜傷遁擒殺數百大策凌敦多卜移營台什哩山
曼濟兵亦敗歸俱由哈布塔克拜達克遁疏入
詔嘉獎之十一月授靖遠大將軍先是

上以軍前大臣甚少

命錫保於軍營衆官中擇可勝副都統護軍統領之任者
密封陳奏十二年二月疏言新調吉林佐領委署
前鋒翼領阿思哈黑龍江協領委署前鋒翼領布
爾沙均屬効力請

賞給副都統職銜

詔允之七月偵知賊赴額德爾河源遣王丹津多爾濟等
率兵邀之於奔博圖山嶺八月師至額爾德尼昭

遇賊兵鏖擊十餘次賊且戰且却日暮抵大山梁
一面偏水戰益酣殺賊萬餘餘賊負傷奔獲械畜
無算十一年四月奏言察罕廋爾當阿爾台諸路
要道建城駐兵歷有年所嗣以薪芻不足移駐阿
勒達爾托羅海去年又移駐烏里雅蘇台此外尚
有額德爾齊德爾爾特爾啓塔密爾地各寬濶然並
在杭愛山陽與內地近至特斯等處僻在迤北若
賊由南路來犯要擊堵禦呼應不靈並不便駐大

兵今已於烏里雅蘇台山頂分建礮臺就近令滿洲蒙古兵駐劄且特斯台什哩各駐萬人賊不敢逼應請即於烏里雅蘇台內外植木中實土為城設倉庫明春以察罕廋爾所貯銀米軍裝火藥等物陸續解運

上從之七月議賊越克爾森齊老時不速發援失機罪罷大將軍任削爵以其長子熙良襲熙良初於雍正三年封輔國公尋授散秩大臣五年晉封鎮國公

十年正月封世子三月署鑲紅旗漢軍都統十一年七月以父罪革世子十二月襲封多羅順承郡王乾隆元年二月管鑲藍旗覺羅學九年四月薨謚曰恪九月以其長子泰斐英阿襲十三年授宗人府右宗正十五年管鑲紅旗覺羅學十九年四月任左翼前鋒統領十月遷正黃旗漢軍都統二十一年六月轉左宗正七月薨謚曰恭以其第七子恒昌襲四十三年薨謚曰慎五十一年以其長

子倫柱襲封多羅順承郡王

多羅謙襄郡王瓦克達

瓦克達禮烈親王代善第四子天聰元年五月

上親征明寧遠明總兵滿桂拒戰大敗之追至寧遠城下

殺其士卒甚衆瓦克達亦以力戰被創崇德五年

七月隨睿親王多爾袞圍明錦州見敵兵出樵者

瓦克達率十餘人越前鋒統領布顏軍擊斬之六

年八月我兵圍錦州明總督洪承疇集兵十三萬

來援次松山大軍進擊之敵騎兵來奪我紅衣礮
瓦克達同輔國公滿達海奮擊却敵會天雨接戰
復敗之進擊承疇三營步兵瓦克達驟馬而前敵
衆辟易前鋒什長費雅思哈失馬瓦克達援之累
騎出叅領哈寧阿被創墜馬瓦克達返戰入敵陣
挈以歸順治元年四月隨睿親王入山海關破流
寇李自成追勦至望都十月隨英親王阿濟格由
邊外趨綏德二年五月自成南遁瓦克達隨英親

王阿濟格追至湖廣安陸府與護軍統領鰲拜進戰賊衆乘船竄瓦克達率師涉水登岸射殪賊衆無算取其船以濟大軍先是瓦克達以兄子阿達禮謀立睿親王事緣坐黜宗室至三年正月叙功授三等鎮國將軍復入宗室五月蘇尼特部騰機思等叛奔喀爾喀瓦克達隨豫親王多鐸往討至圖拉河同吳拜領兵千擊之殺喀爾喀布顏圖台吉等十一人進至布爾哈圖山與貝子博和託合

軍斬千餘級擒八百餘人獲駝馬牛羊無算又擊
敗喀爾喀土謝圖汗碩雷汗兵十月凱還四年三
月議叙封鎮國公五年十一月晉封多羅郡王十
二月以喀爾喀擾我邊界

命隨英親王阿濟格駐防大同適總兵姜瓖叛據大同附
近郡邑應之王隨英親王圍渾源州六年三月睿
親王統師拔渾源州令還京七月

命同親王滿達海勦賊朔州寧武八月以巨礮克朔州城

偽總兵姜之芬偽兵道孫承乾高奎等遁王與輔
國公薩弼擊敗其還戰兵移師攻寧武闕偽總兵
劉偉偽兵道趙夢龍焚城西遁王追之時大同偽
總兵楊振威通款英親王軍斬瓌首以降偉夢龍
等亦率偽將五十餘人兵五千四百餘降於軍平
靜樂縣及寧化所八角堡諸寨十月

詔滿達海還京以瓦克達為征西大將軍勦撫山西餘賊
七年二月疏報平定潞安平陽澤州偽總兵申亥

郭中傑魏閑各率餘黨歸順明大學士李建泰初
已投誠至是復同姜瓖叛據太平縣我兵圍之二
旬餘窮蹙出降

上命誅建泰及其兄弟子姪籍家產入官三月疏報平陽
府屬三十六州縣皆平四月班師八年二月

特加封號曰謙郡王三月

命管理工部事六月隨

駕幸南苑賜鞍馬一十月任議政九年正月醫人何大福

出入部署招搖嚇詐事覺伏誅王坐徇縱罰鍰罷
部任四月罷議政八月薨年四十七康熙十年五
月追謚曰襄先是王征山西時嘗駐平陽府平陽
民感其戢軍安民德建祠致祭榜曰多羅謙郡王
廟順治十年議政王等以瓦克達曾獲罪其爵不
應承襲

上憫其子留雍哈爾薩

命食奉國將軍品級俸康熙六年四月哈爾薩等訴其父

軍功輔政大臣鰲拜尚書馬爾賽為哈爾薩姻戚
議封哈爾薩為鎮國公留雍鎮國將軍八年七月
留雍以已不得與弟一例晉爵訴不平議政王奏
留雍等俱夤緣得封應革哈爾薩鎮國公並原有
之奉國將軍品級留雍應革鎮國將軍仍食奉國
將軍品級俸得

旨哈爾薩奉國將軍品級俸乃

世祖章皇帝恩給仍如舊二十一年五月哈爾薩復訴父

爵係軍功所得例得襲宗人府以奏

命襲封鎮國公並封其子海青為輔國公二十二年八月
授宗人府左宗人二十四年九月遷右宗正二十
五年十月

諭責哈爾薩鑕營不安分罷右宗正任削鎮國公及海青
輔國公爵以其兄留雍襲封鎮國公三十七年四
月

詔宗人府會同領侍衛內大臣察劾行走懶惰者削留雍

爵停襲乾隆四十三年三月

上追念謙襄郡王瓦克達著有功績現無承襲之人

恩賞瓦克達子孫一等鎮國將軍爵世襲罔替以留雍之
曾孫洞福襲初留雍第三子原封三等輔國將軍
台渾生忠端為閒散宗室洞福忠端第二子也至
是襲封一等鎮國將軍四十九年十月授護軍統
領

輔國公瑪瞻

瑪瞻禮烈親王代善第六子天聰九年五月大兵

征明山西瑪瞻奉

命隨貝勒多鐸從廣寧入明寧遠錦州界以牽制明兵俾

毋援山西敗明兵於大凌河陣斬副將劉應選追

奔及松山克一臺瑪瞻並在事有功崇德元年封

輔國公隨武英郡王阿濟格饒餘貝勒阿巴泰往

征明至安州連克十二城九月凱還

上行郊勞禮

賜宴瑪瞻與

賜金卮酒三年八月隨貝勒岳託征明由牆子嶺毀邊城

入敗明總督吳阿衡兵連克臺保越京師至山東

十一月卒於軍年二十七年四月與兄岳託觀

俱至

盛京

上哭之慟

遣貝子及大臣等奠酒

賜銀二千兩馬駝各一無嗣爵除



欽定八旗通志卷一百二十二

欽定四庫全書

史部

欽定八旗通志卷

一百二十三至
一百二十四

欽定四庫全書

欽定八旗通志卷一百二十三

人物志三

宗室王公傳一之下

多羅克勤郡王岳託
顯榮貝勒喀爾楚輝
鎮國

將軍品級巴思哈

多羅克勤郡王岳託

子羅洛渾
鐸
五世孫福彭
孫羅科

岳託禮烈親王代善長子

太祖高皇帝孫初授台吉天命六年二月大兵畧明奉集

保將還有小卒言明兵去此不遠岳託與台吉德格類等追擊之抵其營明兵驚潰追至黃山暨武靖營乃還三月

上親征明拔瀋陽城大軍方追明總兵李秉誠朱萬良姜弼等於白塔鋪岳託後至同逐北四十里途斬級三千餘初喀爾喀扎魯特部貝勒昂安執我使者送葉赫被殺八年四月

命岳託同台吉阿巴泰等討之斬昂安父子還事詳饒餘

敏郡王傳十一年八月

太祖龍馭上賓岳託與弟薩哈璘共至其父大貝勒代善所告曰國不可一日無君邦家大事宜早定策

四貝勒才德冠世深得人心衆皆悅服當速繼大位代善云此我夙心也汝等言正合我意遂與岳託及薩哈璘作議書次日詣

朝出書言推戴

太宗文皇帝嗣統衆貝勒皆喜議遂定

上讓至再三衆議益堅乃從之十月蒙古五部落背盟岳
託隨父代善弟薩哈璘率兵萬人征之斬扎魯特
部之鄂爾齊圖貝勒又生擒其貝勒十四人盡俘
其衆以歸是年封貝勒天聰元年正月同二貝勒
阿敏貝勒濟爾哈朗等征朝鮮攻義州定州漢山
三城克之渡嘉山江克安州至平壤城其守者棄
城遁遂渡大同江次中和遣使諭朝鮮王李倬降
時阿敏議欲直趨其都岳託知不可止密與濟爾

哈朗定議駐師平山城遣副將劉興祚諭李侗侗
報願歲貢方物岳託謀曰吾等事已成矣蒙古與
明皆敵國或有邊事當預防宜盟而班師盟成以
告阿敏阿敏以己未與其事仍縱掠岳託曰盟成
而縱掠非義也勸之不可復令李侗弟覺與阿敏
盟乃班師五月從

上親征明同三貝勒莽古爾泰等率偏師護塔山糧運敗
明兵復從

上移駐錦州圍寧遠並有功八月敗明兵于牛莊斬守備
一千總二百總二兵三百二年五月同貝勒阿巴
泰碩託征明錦州有功詳饒餘敏郡王傳三年八
月同貝勒濟爾哈朗等略錦州寧遠焚其積聚還
十月

上親征明岳託同濟爾哈朗由大安口入旦見明兵營山
上岳託率兵半駐以待濟爾哈朗以其半擊之復
見有明騎兵自遵化來援者顧謂濟爾哈朗曰我

當擊此遂進擊五戰皆捷十一月至遵化與

御營合明大同總兵滿桂宣府總兵侯世祿屯順義縣岳
託同阿巴泰分路邀擊走之順義知縣率衆降師
薄北京復從父代善擊敗明援兵十二月同貝勒
薩哈璘等圍永平克香河縣四年正月攜明投誠
副將孟喬芳楊文魁遊擊楊聲遠及兵四百還自
永平

上命同貝勒豪格等還守瀋陽五年七月初設六部

命掌兵部事八月

上征明大凌河城自白土場趨廣寧岳託同貝勒阿濟格等率兵二萬別由義州進會大軍都統葉臣率鑲紅旗兵圍城西南岳託軍為策應十月明總兵祖大壽請降以其子可法為質可法見諸貝勒欲下拜岳託曰我等戰則為仇敵和則為兄弟何以拜為命以國禮見因問爾等死守空城何意曰畏誅戮耳岳託曰遼東以久抗不降故誅之殺永平人

乃貝勒阿敏所為已論罪幽禁矣我

皇上即位以來敦行禮義政治一新撫養黎民愛惜士卒
仁心仁政爾等豈不聞之可法曰

皇上於貧者衣食之富者秋毫無擾寬仁愛民之德實皆
聞之遂辭歸越三日大壽以城降復同諸貝勒等
夜襲敗錦州兵事具饒餘敏郡王傳六年正月疏
言前克遼東廣寧漢人拒命者誅之後復克永平
灤州漢人縱極力撫諭人多疑懼今天與我以大

凌河漢人正使天下知我國善養人也臣愚以為若能善撫此衆嗣後歸順者必多當先予以家室出公帑給其需倘邀

天眷奄有其地仍各給還家產彼必忻然悅服其歸誠各官宜令諸貝勒給莊一區每佐領各取漢男婦二名牛一頭編為屯人給二屯其出二口耕牛之家該佐領以官值償之至明兵棄鄉土離妻子窮年累月戍守各城一苦也畏我誅戮又一苦也今慕

義歸降之漢兵須令滿漢賢能官善為撫恤毋致
一人失所則人心歸附大業可成

上嘉納之五月明兵棄錦州遁

命同貝勒阿巴泰碩託略明地併隲錦州城旋與貝勒濟
爾哈朗等率兵二萬略察哈爾於歸化城黃河一
帶俘獲以千計九月同貝勒德格類拓疆自耀州
至蓋州以南七年六月

詔問征明及朝鮮察哈爾三者何先岳託奏言時不可失

宜於山海關通州北京三路乘時先圖其一則丕
基定矣是月同貝勒德格類率左翼楞額禮葉臣
右翼伊爾登昂阿喇每旗副將一叅領一佐領驍
騎校一及漢軍都統石廷柱元帥孔有德總兵耿
仲明攻明旅順口俘獲無算八月奏言前蒙

聖諭令留一都統守旅順口今留葉臣伊爾登帥兩翼每
旗留官三員兵二千五百漢軍以遊擊佟圖賴主
之統備禦二員兵百名駐守臣等自木場驛起行

俟抵我邊界貯礮車於蓋州留俘振旅是月師還
上率諸貝勒大臣郊迎十里外以金卮酌酒

賜之八年二月奏定馬匹倒斃擇牛彘殷實之家酌免丁
徭責令償補又奏減牛彘下廝養卒得

旨惟哨長許留餘悉罷三月

上大閱岳託率滿洲蒙古等十一旗行營兵赴瀋陽城北
郊列陣二十里許

上駐蒲馬岡岳託指示紀律軍容嚴肅

上嘉獎之五月

上征察哈爾

諭留守諸貝勒及將領畢岳託復曉於衆曰自堤岸以東
巨流河以西原置十四哨爾等酌量布置晝則令
軍士習射夜勿解衣張弓開甲囊以防不虞岳託
遂隨行有疾六月

上臨視

命還

盛京九年二月同貝勒多爾袞薩哈璘豪格往收察
哈爾林丹汗子額哲六月師還諸貝勒略明山西
岳託以疾分兵千留駐歸化城會土默特部人來
告博碩克圖汗子俄木布遣人往阿魯喀爾喀及
明使者至將謀我岳託伏兵邀之俄木布乳母之
夫毛罕知之密使人趣之還伏猝起誅毛罕擒明
使者隨命土默特捕斬阿魯喀爾喀之謀匿馬駝
者部分土默特壯丁三千三百有奇為十隊每隊

以官二員主之授條約并頒示鄂爾多斯部尋諸
貝勒會師歸化城岳託偕還崇德元年四月晉封
和碩成親王八月以徇庇莽古爾泰碩託且有離
間鄭親王濟爾哈朗及肅親王豪格事論死

特旨寬宥之降多羅貝勒罷兵部任十一月復

命攝兵部事十二月從

上征朝鮮朝鮮王李倧奔南漢山城岳託同豫親王進圍
之敗其援兵於城下二年八月

命兩翼較射奏不能執弓

上曰爾徐引射之不射如他王貝勒何

諭再三始引弓弓墮地者五遂擲之諸王等論岳託驕慢

當死

上復寬之降固山貝子罷部任罰鍰三年正月復封多羅

貝勒管旗務二月從

上征喀爾喀至博碩堆偵扎薩克圖汗遁乃還八月奉

命為揚威大將軍貝勒杜度副之統右翼兵睿親王多爾

袞為奉命大將軍統左翼分道伐明九月從密雲
東北牆子嶺口毀邊牆入明兵於保外立三寨我
師攻克之獲敵哨卒知保堅且有重兵不易拔嶺
東西有間道可越於是分兵攻其前以牽敵師潛
從間道踰嶺入克臺十有一尋以疾薨於軍年四
十有一四年三月左翼睿親王奏捷

上覽奏無岳託名驚問知病卒

上慟哭久之且

命勿使禮親王知四月喪還

駕至沙嶺設幄遙奠還

御崇政殿

命親王以下及諸大臣往奠王貝勒還復

命乃還宮

輟朝三日

詔追封為多羅克勤郡王

賜馬五駝二銀萬兩葬

盛京城南五里萬柳塘康熙二十七年十一月

命立碑紀功乾隆八年

駕幸

盛京

親詣王園寢

賜酌

御製詩曰開國承家日于藩夾輔資一時扶王業四海
定丕基懿德書金匱佳城奠玉卮銀潢天共遠百世

篤宗支四十三年正月

上追念王忠勳

命配享

太廟其現襲之平郡王復封號曰克勤八月

命入祀

盛京賢王祠是年

駕幸

盛京復

賜酹王園寢

御製詩曰每陳開國策均合

聖人心不少赴桓衆

獨嘉幹略沉佳城留故里致奠重躬臨彰善俾觀感伊予

此意深四十八年

駕三詣

盛京

賜酹如初

御製疊戍戍詩韻曰讓帝之冢子首陳推戴心忘家惟
為國力勇更謀沉我

祖所嘉許予躬應奠臨

闕宮教配享彰善意猶深岳託次子羅洛渾于崇德四年
九月襲封多羅貝勒官旗務五年五月

命同鄭親王濟爾哈朗等往迎蒙古多羅特部蘇班岱阿
巴爾岱等降衆敗明兵事詳鄭獻親王傳九月同
鄭親王圍錦州六年三月復圍之設伏敗明援兵

於南山西岡六月睿親王多爾袞肅郡王豪格等
來代合擊明山海關援兵追及松山城還八月從
上征克松山擒明總督洪承疇巡撫邱民仰等七年七月

叙功

賜蟒緞七十八年正月以怨懟非議又

敏惠恭和元妃薨時絲竹不輟論罪削爵五月復多羅

貝勒管旗務

上命濟爾哈朗多爾袞

召羅洛渾諭曰爾父屢獲罪譴因

皇考太祖

皇妣太后撫養為子朕視之如弟沒後猶追封克勤郡王
並加惠於爾命為多羅貝勒管旗務爾不思率由善道
以輔國政嗜酒作慝致干國法朕又追念爾父特行寬
宥復爾多羅貝勒令管旗務爾當敬慎修身勤思善行
若仍嗜酒妄亂不特爾祿位難保即置爾于法亦所不
赦至本旗所屬諸臣俱宜戒酒仍勸勉貝勒効力贖罪

羅洛渾同諸臣叩首謝罪順治元年十月以從定
京師破流寇有功晉封多羅衍禧郡王三年正月
同靖遠大將軍肅親王豪格征四川八月薨於軍
年二十有四五年正月喪還

命貝子屯齊鎮國公拜音圖輔國公鞏阿岱等迎之

輟朝二日康熙十年六月追謚曰介羅洛渾長子羅科鐸
于順治五年閏四月襲封多羅衍禧郡王八年二
月改封號曰平十五年正月同安遠靖寇大將軍

信郡王多尼征明桂王朱由榔于雲南破其晉王
李定國鞏昌王白文選兵十六年六月

賜蟒衣弓刀鞍馬旌其勞康熙二十一年七月薨年四十

有三謚曰比以其第四子訥爾圖襲訥爾圖于康
熙二十二年襲封多羅平郡王二十六年五月以
毆斃無罪人及折人手足議罪削爵以其弟訥爾
福襲四十年薨謚曰悼以其長子訥爾蘇襲五十
七年十一月隨撫遠大將軍允禔收西藏尋駐博

羅和碩五十九年正月移駐古木六十年十月攝
大將軍事六十一年十一月復攝印如故雍正元
年正月還京攝

上駟院事四年七月以前在西寧軍前貪婪受賄削
爵乾隆五年九月卒

命仍以郡王禮葬訥爾蘇長子福彭于雍正四年七月
襲封多羅平郡王十年正月任鑲藍旗滿洲都統
四月奏言外省來京襲職旗員到日隨奏不令久

候多費以仰副

體恤至意從之閏五月授宗人府右宗正十一年二月充
玉牒館總裁四月

命軍機處行走七月

命為定邊大將軍討逆賊噶爾丹策凌十一月師駐烏里
雅蘇台十二月奏言軍中馳馬最要今喀爾喀扎
薩克貝勒班第等感

恩獻馳馬力請停償值伏念遠臣當軍興際不私所有况

宗室王貝勒貝子公等皆有馬場滋生馬匹豈不
內愧于心臣家有馬五百匹願送軍前備用並將
臣奏宣示諸王貝勒等臣料諸宗臣必以臣言為
當彌切踴躍急公之義得

旨先行十二年六月奏烏里雅蘇台扎克拜達里克推河
並應撤京城滿洲漢軍右衛寧夏察哈爾土默特
兵三千六百所有內扎薩克及烏蘭察布兵三百
七十調赴推河駐防現在烏里雅蘇台餘兵九千

不敷調遣請以洪郭爾鄂隆所調滿洲兵六百再
增撥四百速赴軍營從之是月王率將軍傅爾丹
赴科布多總統北路軍營令內大臣薩木哈掌威
遠將軍印辦理烏里雅蘇台軍務八月

詔量撤北路兵王率副都統王常等領兵還十三年閏四
月

命總統大軍駐鄂爾坤七月於額爾德尼昭迤北築城尋
以公慶復代還京乾隆元年二月

上以北路所存糧米如何令蒙古兵支領並屯獲縻麥
出陳易新之處交王酌議尋奏言蒙古兵向不給
糧臣前以坐卡兵遠臨賊境取羊未便曾折給一
月米糧茲蒙

皇上軫念蒙古一視同仁加

恩賞米臣議將存留之喀爾喀兵及坐卡臺站蒙古兵
挽米支給今王大臣等又議將派駐鄂爾坤之蒙
古兵給糧在此時存米充裕不難概給倘日久米

少議停轉生怨望且準噶爾鬼蜮多端將來或仍
須蒙古兵移駐又豈能一例支給北地寒冷蓋藏
得宜米可經三四年不壞臣愚于駐防蒙古兵酌
量賞給餘請仍給羊價為便再鄂爾坤種地兵已
撤糜麥無從出陳易新青稞大小麥較難耐久應
請

恩賞蒙古米糧先給此項麥石又奏言喀爾喀所牧馬
除留軍營備用外各游牧處現有馬二萬九千餘

內扎薩克各游牧處馬四萬餘伏思鄂爾坤駐兵
以歸化城為聲援其間距三千餘里鞭長莫及中
途須有馬接換往來緩急始足恃請度適中地近
臺站水草佳處設馬廠于土默特察哈爾兵內擇
有眷屬者移駐牧放令歸化城都統攝理再請撥
馴馬萬兒馬二千令臺站總管撥入官馬廠牧放
備用有事無難輕騎疾馳馬力足而人心可恃雖
道遠無慮矣

詔並下王大臣議行三月任正白旗滿洲都統十月調
正黃旗滿洲都統三年七月預議政十三年十一
月薨年四十有一謚曰敏十四年三月以福彭長
子慶寧襲十五年薨謚曰僖以原襲平郡王訥爾
蘇之孫慶恒襲慶恒乃貝子福秀長子出為福彭
後是年十二月襲封多羅平郡王十九年任鑲紅
旗漢軍都統二十六年授宗人府右宗正尋總理
鑲紅旗覺羅學二十七年坐旗員冒借官銀降固

山貝子餘任悉罷四十年復封多羅平郡王四十三年正月

命復克勤郡王始封之號仍為克勤郡王四十四年二月薨謚曰良以原襲平郡王訥爾圖之孫雅朗阿襲雅朗阿乃閑散宗室訥清額第十子初于乾隆十六年授三等侍衛二十六年七月任鑲紅旗蒙古副都統九月授烏里雅蘇台叅贊大臣二十七年調正紅旗滿洲副都統尋授科布多叅贊大臣

三十一年任成都副都統三十四年授荊州將軍
三十五年十月以袒護所屬驍騎校楚德降三級
調用十一月以副都統品級往庫爾喀喇烏蘇辦
事三十七年五月復以徇隱臺站屬員不法削副
都統品級在伊犁印務筆帖式行走八月奉
旨在庫爾烏蘇章京處辦事十月以副都統品級赴塔
爾巴哈台十一月

諭獎其辦事得制仍留庫爾喀喇烏蘇辦事三十八年

任三姓副都統三十九年調

盛京副都統四十年調黑龍江副都統四十一年遷

綏遠城將軍四十四年襲封多羅克勤郡王四十

五年總理鑲藍旗覺羅學尋授宗人府右宗正四

十七年任正白旗漢軍都統四十八年四月調鑲

紅旗滿洲都統七月調正黃旗滿洲都統五十九

年薨諡曰莊子恒謹襲

多羅顯榮貝勒喀爾楚渾

喀爾楚渾克勤郡王岳託第三子順治元年四月
隨睿親王多爾袞入山海關破流賊李自成追擊
至望都二年二月叙功封鎮國公三年正月隨靖
遠大將軍肅親王豪格征四川流賊張獻忠時賊
黨據陝西同貝子滿達海進勦偽叅將石國璽等
五十餘人率賊衆降賊首高如礪遁三台山我軍
掘壕圍之如礪亦率衆降十一月肅親王進征四
川斬獻忠於西充喀爾楚渾在事有功五年正月

班師八月任鑲紅旗滿洲都統六年正月隨敬謹親王尼堪討大同叛鎮姜瓖師至太原賊由寧武關迎戰喀爾楚渾遣都統阿賴庫魯克達爾漢等擊敗之進圍寧武賊夜犯我鑲黃鑲紅兩旗汛地復遣護衛兵迎擊兩戰皆捷四月由左衛往圍大同偽總兵楊振威斬瓖降十月晉封多羅貝勒八年二月攝理藩院事八月薨年二十有四諡曰顯榮立碑紀功康熙十三年三月復立碑旌之喀爾

楚渾長子克齊于順治九年襲封多羅貝勒康熙
六十一年六月薨年七十有二以其長子魯賓降
襲魯賓初于康熙二十三年封固山貝子三十年
授宗人府左宗正三十五年

上征噶爾丹同都統喀岱等統領鑲藍旗營三十八年以
情罷宗正任雍正元年改降襲固山貝子四年二
月坐舉動狂悖削爵三月以魯賓無應襲貝子之
人復降封輔國公乾隆八年卒以魯賓嗣子宗智

之第四子訥穆金降襲奉恩將軍二十五年授三等侍衛累遷至頭等侍衛四十八年卒四十九年五月以訥穆金次子薩賓圖襲封奉恩將軍

鎮國將軍品級巴思哈

巴思哈克勤郡王岳託第五子崇德四年正月封鎮國將軍順治六年十月晉封多羅貝勒九年七月奉

命同定遠大將軍敬謹親王尼堪統官兵往湖南征流賊

張獻忠餘黨孫可望等

賜蟒衣鞍馬弓矢十一月敬謹親王戰歿於衡州

命貝勒屯齊代其軍與巴思哈合營三月由永州趨寶慶

敗賊兵十萬於周家坡十一年十月議隨敬謹親

王出征敗績罪削爵還京師十二月三月擢任鑲

紅旗滿洲都統八月復授鎮國公品級十五年正

月隨安遠靖寇大將軍信郡王多尼征明桂王朱

由榔於雲南合四川廣西兩路軍期進取十一月

抵貴陽趨安莊擊斬其衆十六年正月大軍薄雲
南省城同貝勒尚善等克鎮南州玉龍關永昌府
騰越州六月

賜蟒袍鞍馬勞之十七年五月師旋七月議前征雲南時
撤永昌門兵致軍士入城擾民降鎮國將軍品級
十八年卒以巴思哈次子固克度渾降襲三等輔
國將軍品級康熙四年卒以巴思哈第三子庫布
素渾降襲三等奉國將軍品級十二年晉封三等

輔國將軍品級三十四年以病誤較射削爵以其
長子蘭鴈降襲三等奉國將軍品級五十八年卒
以蘭鴈第三子宗智降襲奉恩將軍品級雍正八
年授三等侍衛尋遷二等侍衛乾隆元年授前鋒
叅領四年擢副都統八年卒以蘭鴈第六子宗熹
降襲雲騎尉品級四十年十二月因軍政虛報年
歲削級爵除

欽定四庫全書

卷一百二十三

欽定八旗通志卷一百二十三